

Эшигинг остонасини эҳтиёт қил!



13:56 / 03.11.2025 2371

Азиз ўқувчилар, ушбу мақоланинг биринчи қисмини [«Уйинг остонасини ўзгартир!»](#) сарлавҳа номи билан веб саҳифамизда эълон қилган эдик. Энди мақоланинг кейинги қисмини сиз азизларга тақдим этамиз.

Иброҳим алайҳиссалом ўғли Исмоилни кейинги кўргани келганида ҳам у тирикчилик билан чиқиб кетган эди. Уйда хотини бор эди. Иброҳим алайҳиссалом келинидан уларнинг қандай яшаётганини суриштирди. Келин ҳаётдан нолимади, қийинчиликдан шикоят қилди. Иброҳим алайҳиссалом ўғлига келинини талоқ қилишини буюрди. Ўғли, олдинги суҳбатда айтганимиздек, отасининг гапига бўйсуниб, хотинини талоқ қилди.

Кейинроқ Иброҳим алайҳиссалом яна ўғлини кўргани келди. Ўғли уйда йўқ эди. Аммо уйда янги келини бор эди. Иброҳим алайҳиссалом ундан эрини сўради. Келини шундай жавоб берди:

- Бизга ризқ қидириб кетганлар!

Иброҳим алайҳиссалом сўради:

- Аҳволингиз қандай? Қандай яшаяпсизлар?

Биз яхшилик ва кенгчиликдамиз, алҳамдулиллах!

- Нима еяпсизлар?

- Гўшт!

- Нима ичяпсизлар?

- Сув!

Иброҳим алайҳиссалом дуо қилди:

Аллоҳим! Уларнинг гўшт ва сувига барака бергин!

Афсус, ўшанда бошқа таомлари бўлмаган экан. Йўқса, уларга ҳам барака сўраб дуо қилган бўлармиди!

Сўнгра Иброҳим алайҳиссалом келинига деди:

- Эринг келса, мендан салом айт. Яна айтгинки, эшиги остонасини эҳтиёт қилсин!

Исмоил алайҳиссалом келгач, хотинидан сўради:

- Бирор киши келдими?

- Ҳа, бир нурли, чиройли кўринишдаги чол келди. Сизни сўради. Тирикчилик учун кетганингизни айтдим. Кейин турмушимиз ҳақида сўради. Яхши яшаяпмиз дедим!

Исмоил алайҳиссалом сўради:

- Сенга бирор нарса дедими?

Ҳа! Сизга салом айтди. Яна, эшигингиз остонасини эҳтиёт қилишингизни айтди!

Исмоил алайҳиссалом деди:

- У киши менинг отам бўладилар. Эшигимнинг остонаси сенсан. Сени авайлашимни менга тайинлабдилар!

Исмоил алайҳиссалом олдинги аёли даврида қандай бўлса, кейинги хотини даврида ҳам ўшандай эди. Овчилик билан шуғулланарди. Яхши мерган эди. Камон билан ов қиларди.

Бир куни Набий соллаллоҳу алайҳи васаллам саҳобаларнинг олдидан ўтиб қолдилар. Улар камондан ўқ отиб машқ қилишаётган эди. Расулуллоҳ соллаллоҳу алайҳи васаллам уларга қараб: «Отинглар, эй Исмоилнинг болалари! Отангиз моҳир камончи эди», дедилар.

Исмоил алайҳиссаломнинг хотинлари ўртасида катта фарқ бор эди. Олдинчилари шикоят қиладиган, нолийдиган аёллар эди. Учинчиси эса бориға қаноат қиладиган, топганиға рози бўладиган аёл. Зеро, бойлик қўлдаги нарса эмас, қалбдаги нарсадир!

Олдинги икки хотин сирларни очадиган аёллар эди. Уйдаги ишларни кўчага чиқаришар, эрларидан шикоят қилишар эди. Кейингиси эса, уй сирларини беркитадиган, неъматларға шукр қиладиган, топса ҳамд айтадиган, топмаса ҳам сабр қилиб, Аллоҳға шукр қиладиган аёл эди!

Қаноатли, солиҳа аёл дунё хазиналаридан биридир. Агар сизда шунақаси бўлса, тиш ва тирноғингиз билан уни қаттиқ ушланг. Унинг сабри ва ризоси туайли баъзи бир камчиликларини кечиринг. Бирор киши хатодан холи эмас. Ундан камолотни талаб қилманг, чунки ўзингиз ҳам комил эмассиз!

Инсонда шунақа сифатлар бўладик, улар туфайли бошқа камчиликларни кечириб юборса бўлади. Озгина айб сабаб кўп яхшиликдан кўз юмманг. Биз пайғамбар эмасмиз!

Ота-оналар келинларини сабрли ва рози бўладиган, гўзал хулқли ва ақлли эканини кўрсалар, ўғилларининг олдида уни мақтаб қўйсинлар. Уларни муҳофаза қилишни тайинласинлар. Бу пайғамбарлар хулқидир.

Келин ҳақида айтиладиган гаплар куёв ҳақида ҳам айтилади!

«Набавий тарбия» китоби асосида тайёрланди

Ўзбекистон Республикаси Дин ишлари бўйича қўмитанинг 2023 йил 7 мартдаги 03-07/1506-рақамли ва 2023 йил 24 мартдаги 01-07/1959-рақамли хулосалари асосида тайёрланган.